

## Шунмгъа загъсчнр

Ханты - Мансийск округин, Сургутск районд, Обь голин эрг деер, Черный Мыс селанд загъсна консервн заводт зовър олин хальмг өрк-бүл баянә. Ирснәсн нааран хальмгуд урднъ үзәд-кегәд уга загъсна кәдлмшиг түрүн өдрәсн авн, икбагъ уга медж, шунмгъа кевәр кәдлджәцхәнә.

Эн джил Обь голд ик гидг загъсн бәргдджәнә. Тер учрар, консервн заводин кәдлмшчнрин кәдлмш улм элвәд йовна. Заводин альк болв чигн кәдлмшднъ ик зууднъ мана хальмгуд орлцдж, нүүрт йовх улсин тоод баяцхәнә.

Загъс йилгәдг цехд бригадир болдж Дорджин Бембш кәдлнә. Ухан-седклән тавәд кәдлдж, әмтнд үзмдж болджах Бембш данъгин күндллгәнә доскд нернъ бичгднә. Тер цехд хальмг күүкд улсин гурвн бригадс баянә. Эдн болхла сар болгън зурагъан 300 процент күргдж күцәнә.

Загъс давсллгәнә цехин Бамбга Болвсна бригад өдрә зурагъан 305 процент күцәнә. Эн

цехин Ванькин Цастан бригадт Күлмән Зургъан гигәд медәтә эмгн кәдлнә. Наснъ медәтә бийнъ Зургъан шунмгъа кевәр кәдлдж, багъчудт үлгүр өгч, дамшлтан хувацна. Багъчудтан Зургъан келнә: „Хавртан өссн-боссн Хальмг теегүрн нүүх болджанавдн. Тиигхлә, ардан келн болхар кәдлх кергтә. Ода намаг хәләхнтн, төрскнән орхан ухалчксн, кәдлмш икдх дутман, гар-кәлм чанъгърад баянә“.

Эн района „Путь Ленина“ колхозд Явана Санджин бригад загъс бәрлгәнә нүүрт йовна. Бригадт хойр звено хальмгуд—Цастин Шинә, Манджин Очр хойр кәдлнә. Загъсчнр шунмгъа кевәр кәдләд, джилә зурагъан сентябрь сарин эклцд күцәцхәв.

Хавртан, Хальмг танъгъчдан ирәд, энүнләгъән әдл үзмджтә кевәр кәдлдж, танъгъчиннъ тосхлтд орлцхвдн, гидж эдн келнә.

ДАВАН Гәрә.

Сургут, Черный Мыс селән.